

Lauxsae Gou

我的老师

贵港市覃塘区蒙公镇高占小学六年级 Leiz Cinyez/雷振越

Siujoyz roek bi, gij lauxsae son gou lumj baenz duj baenz duj vameizgveiq nei gyaundeir rangfwd, youq ndaw gij va neix, cix yo miz duj vabeghab hausag caemcingx ndeu, haenx couh dwg Veiz lauxsae.

Veiz lauxsae yienghsienq gig itbuen, doiq da laeg' yum mboep haeuj ndaw bae, yawj hwnjbae "yiemzsuk dwglau", hoeng de cix miz di lumj lwgnyez nei hozoiq dwggyaez. Caenhguen de gangj gij dauhleix hawj gou haenx dingzlai cungj dwg rwz neix haeuj rwz haenx ok. Hoeng, miz song gienh saeh gou lij geiq ndaej gig maenh.

Gienh saeh daih' it dwg veh vehsuijcaij. "Veh vehsuijcaij lo!" Ngoenzde, Veiz lauxsae dawz gij liuh suijcaij de gag aeu cienz swheij cawx ma haenx, vad fwngz coi dou. Daeujdaengz meijusuzs, dou angqfwngfwng, bu ceijveh ok, boiq ndei saeksuijcaij, henz dou baij rim doengjraemx iq, lumjbaenz dou couh yaek caeuq veh veh hoenx ciengz ciengq ndeu ityiengh. Hoeng, ngamq hainduj veh, ceiqheiq dou couh sied bae haujlai lo. Go' nywj gova yawj hwnjbae gig genjdanh veh haenx, gou

baenzlawz veh cungj veh mbouj lumj! Veiz lauxsae youq ndaw geh "va" ndonj bae ndonj dauq (gwnz naj dou uq saeksuijcaij, bouxboux lumj duj va nei), vixvix diemjdiemj, gangjsebseb, nyaengq raixcaix. "Mwngz yawj," de byaij daengz henz ndang gou doq vix doq gangj, "mwngz veh gij nywj mbouj dwg diegnywj, dwg go' nywj gwnzndoi bw! Nywj gwnz ndoi couh wnggai mbouj you mbouj heiq majhung, lumj byoemgyaeuj dahsau ityiengh mbinfoux. Go-nywj gwnzndoi baenzneix veh, hoeng, youq mbanjraemx couh mbouj doengz lo. Mbanjraemx, dieg biz raemx cuk, go' nywj couh wnggai noengqnt heusausau." De itmienh gangj itmienh gaem fwngz gou, youq gwnz ceij baenz bit baenz veh veh ok gij funghgingj mbanjraemx. Caen geizgvaiq, doengz-yiengh dwg baez daih' it veh, lauxsae veh ndaej caen sengdoengh. "Lwgda dwg aenlaex ceiq ndei gwnz-mbwn hawj raeuz, raeuz aeu hag rox cazyawj, lwgda yawj doenghyiengh lajbiengz, ndawsim yawj saenz-cingz doenghyiengh. Geiq ndaej bw!" Lauxsae riu naeuz.

Gienh saeh daihngaih dwg ganq va. Veiz



lauxsae lij gujli dou ndaem va, dou angqvauvau gaen youq baihlaeng lauxsae, bae aeu namh daeuj coq ndaw batva. Gova ndaem mbeuj lo, ciemz okdaeuj lingh ndaem, naedceh roengz mbouj yinz, couh vat okdaeuj lingh roengz……Dou Cingsim dajleix, hawj gova dwk bwnh、rwed raemx、gaeb non. Dujva hai ndaej ronghsien rangfwd, duzrwi duzmbaj daeuj ndaw va diuqfoux. Couhsuenq moix ngoenz nyaengq ndaej baegfofo, dou hix sim' angq raixcaix. Lauxsae nyinhcaen doiq dou naeuz: "Gij va neix geijlai gyaundeir ha, neix dwg aenvih sou youq gwnz ndang gyoengqde ok haujlai rengz caeuq hanh." Gij vah neix yawj daeuj genjdanh, cix hamzeiq gig laeg.

Couh yaek bizyez lo, dou caen sij mbouj ndaej Veiz lauxsae, de youq ndawsim dou dwg ceiq gyaundeir. Veiz lauxsae, mwngz sinhoj lo, dou docih mwngz!

(boux lauxsae son' gyauq Cuh Veimingz/朱卫明)

Bouxsonlien Yinx Guhcaemz

贪玩教练

Bouxsonlien dwkgienz gou dwg bouxsai, hoeng de cix dangq byoemgyaeuj gienjgut. Neix hawj gou siengj daengz le bohnax Maj Siujdiu, bohnax Maj Siujdiu coh de heuhguh Dingh Gwz, gij byoemgyaeuj bohnax Dingh Gwz couh miz lai cungj nganzsaek. Nanzdauh bouxsonlien neix caeuq bohnax Dingh Gwz dox-lumj, hix dwg "bouxvunz ciuzlouz"? Gou roxnyinh geizheih couh cam: "Mwngz vihmaz dangq gij byoemgyaeuj mwngz gienjgut nyungqnyat yienghneix ne?" "Mizyinx veil!" Siengj mbouj daengz bouxsonlien couh seizbienh gangj coenz vah yienghneix. Ndigah, gou couh heuh de guh "bouxsonlien yinx guh-caemz".

Gou nyinhnaeuz lien dwkgienz naiq raixcaix ha! Moix baez lien dwkgienz roengzdangz le, gou cungj ndang naet rengz naiq liux. Hoeng moix baez roengzdangz gaxgonq, bouxsonlien cungj cam: "Miz mbouj mizyinx ha? Sangj mbouj sangj ha?" Dou doengzcae han naeuz: "Mbouj mizyinx, hix mbouj sangj saek di!" Doeklaeng, bouxsonlien riugan naeuz: "Yienghneix raeuz couh youh daj goek lien baez ndeu, lien daengz sou nyinhnaeuz mizyinx, nyinhnaeuz sangj cij ndaej!" Sik-haek, dou deng hwk dwk lien-muengz doiqlaeng, singhung hemq naeuz: "Mizyinx! Sangj raix-caix……" Ai, caen doiq "boux-

sonlien yinx guhcaemz" neix mbouj miz banhfap.

Riengz "bouxsonlien yinx guhcaemz" hix miz gij saeh mizyinx. Gij lem ha, faexgyaengh ha, giemq ha, mid ha……baez daengz ndaw fwngz de, couh bienqbaenz doenghyiengh guhcaemz. De saj gij doenghyiengh neix caen saenzgeiz ndei yawj, dou yawj dwk dava da'ngawz bae. Mwh roengzdangz yietnaiq, de lij cawx saekdi sietdiuz ha, gvehoengz ha, bingj saejdaeuz ha……dangguh ciengj fat hawj dou. Caen dwg ndeigwn youh mizyinx!

(Anhveih Swngj Vangzsanh Si Youhningz Yen Haijyangz Daih-ngeih Siujoyz ngeih nienzgaep ban 5 Hungz Swjyinh sij, Veiz Yinyiz hoiz)



gojgaeq lwgnyez lienzdaeng

Goyizcienz

榆钱树

5

Riengz dwk seizcin yaek daeuj-daengz, Siujvwnz yawj goyizcienz baezsoq engq lai lo. Hoeng de yawj goyizcienz baezsoq yied lai, ndawsim couh engq caemrig siliengz lo.

Doengh bi seizcin, doengzhag ndawban cungj doxcanj daeuj yawj go faexyzcienz neix, hoeng bineix seizcin……

Duzcinglingz faexyzcienz yawj aennaj Siujvwnz gig doeknaiq, de mbouj lijgaj dwk cam: "Gou dwg gofaex mwngz boux dog, mbouj ndei ha?"

Siujvwnz yawj de haemq nanz cij naeuz: "Mwngz rox Gijgangh vihmaz nyienh caeuq gou guh baengzyoux lwi? Dwg aenvih vayizcienz. Gou gaenq dapwngq de, hawj de boux daih' it daeuj ndawranz yawj goyizcienz. Mwngz ndaej mbouj ndaej bienqbaenz go faexyzcienz hung daihgya cungj yawj ndaej raen ndeu, ngoenz ndeu hix ndaej." Siujvwnz yaek gangj mbouj gangj dwk naeuz.

6

Siujvwnz iu doengzhag ndaw-



ban daeuj yawj goyizcienz. Daihgya bin hwnj gwnzfaex, lumj doenghbaez nei angqyangz guhcaemz, mbwn laep le cij baema.

Siujvwnz lumh ngafaex deng euj raek, mbawfaex loenq roengz haenx, sim baenz mbat baenz mbat in dwk.

Gyanghwnz, Siujvwnz lumj-baenz dingqny miz vunz heuh de.

"Siujvwnz—— Siujvwnz—— caiqraen—— caiqraen!" Sing de miz gij siengsim caeuq sij mbouj ndaej.

Siujvwnz hai aenda de, hoeng de saedcaih baeg lai lo, baenzlawz hix hai mbouj ndaej.

Ngoenz daihngaih, de buet ok ranz bae, ndawhongh hoengqhanghang—— yawj mbouj raen goyizcienz lo. De ngaem gyauej roengz, lae roengz raemxda ienqhoij. Ndaw raemxda, de sawqmwh yawj-raen goyizcienz gaxgonq ndaem haenx did ngaz iq ok daeuj.

Dang ngaz iq menhmenh majhung, maj baenz goyizcienz he, duzcinglingz faexyzcienz haengdingh lij dauqma. Siengj daengz neix, ndawsim Siujvwnz youh cungmuengx maqmuengh……

(Gyah Yingj) (sat)

(dozcap banjneix daj gwnzmuengx aeu)